

Qanoq puisit amiinik tunisassiorneq siuarsarneqarsinnaava, kiisalu suut qanorlu iliuitsit sineriapput tamakkerlugu puisit amiinik tunioraarnerup siunissami qaffasissumiitittuarnissaanut iluaqutaasinnaappat.
(Inatsisartunut ilaasortaqaq Jens Danielsen, Siumut)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Naalakkersuisut sinnerlugit Inatsisartunut ilaasortap Jens Danielsenip puisit amiinik tunisassiornerup tunisinerullu qanoq siuarsarneqarsinnaanerit pillugu apeqquteqaat aallaavigalugu oqallinnissamik siunnersuuteqarneranut qujavunga.

Naalakkersuisut inuussutissarsiorneq pillugu politikkianni pingaartinneqartut ilagaat piniarnermik inuussutissarsiuuteqartut pitsaasunik atugassaqaartinneqarnissaat, taakuummata sineriammi inuussutissarsiornermik ineriartortitsisunut suliffissanullu ikorfartuutaasut.

Naalakkersuisut Kalaallit Nunaata Ammerivianut ingerlaavartumik kiffartuussinissamik isumaqatigiissusiortarput, taannalu inuussutissarsiuutigalugu piniartut sinerissami ameersinnaanissaannik qulakkeerinneqataasarpoq.

Kalaallit Nunaata Ammerivia KNAPK-lu aappaagu kiffartuussinissamut isumaqatigiissutissamik isumaqatiginninniaqatigineqaleruttorput. Isumaqatiginninniarnit ilaatigut imaraat puisip amianik tunisinermit tapiissut kiisalu ammit tunineqarsinnaasut amerlassusissaat.

Amernik tunisinerit amerlanerulernissaat siunertaralugu tunitsiviit amerlineqassanersut aamma oqaloqatigiissutigineqarpoq.

Naalakkersuisut inuussutissarsiuutigalugu piniartunut ameernermit ataatsimut agguqatigiissillugu tapiissut 2018-imi qaffappaat. Taapiissutinullu nutaamik aaliangeeriaatsimik, "majuartarfittut" aaqquissuussaasumik Kalaallit Nunaata Ammerivia KNAPK-lu isumaqatigiissusiortoqarpoq. Tapiissutissanik aalajangersaariaatsip inuussutissarsiuutigalugu piniartut amernik amerlanerusunik tunisinissamut tunngavissaqalernissaannik siunertaqarpoq, amermit ataatsimut tapiissut ammit tunisat amerliartortillugit qaffakkiartortinneqartarmat.

2019-imi tunisinermit periusissiaq Kalaallit Nunaata Ammeriviata KNAPK-llu akornanni isumaqatigiinniutigineqarpoq.

Kiffartuussinissamut isumaqatigiissutissap isumaqatiginninniutigineqarnerani
inuussutissarsiuutigalugu piniartut tunitsiviillu tunisinermit atugaasa

pitsanngorsarneqarnissaat Naalakkersuisut soorlu nalunaarusiarineqartutut ingerlaavartumik sulissutigisarpaat.

Tassungalu atatillugu Kalaallit Nunaata Ammeriviata aningaasaqarnikkut assoralisimaarnerata isiginiarneqarnissaa aamma pingaaruteqarpoq. Kalaallit Nunaata Ammeriviata ukiuni kingullerni kiffartuussinissamut isumaqatigiisummit sinaakkutaasut malillugit aningaasaqarniarnini aqussinnaasimavaa. Kalaallit Nunaata Ammeriviatali aningaasaqarnera ukiuni tulliuuttuni suli ilungersunarnerulertussaavoq aningaaserivinnit piumasarineqarmat taarsigassarsiat naafferartumik ingerlatseqatigiiffimmit akilersorneqalissasut. Ilanngullugu ukiuni tulliuuttuni naatsorsuutigineqartariaqarpoq ingerlatsinermut annertunerusunik aningaasaliisoqartariaqarnissaa, tunisassiornermi atortut nungullarsimani taarsertariaqalernissaalu pequtugalugit.

Kalaallit Nunaata Ammeriviata ukiuni sisamani kingullerni ukiumut kaaviiartitai ilanngaattissat ilanngaatigereerlugit agguaqatigiissillugit 14,5 mio. kr.-it missaanniissimapput, ingerlatseqatigiiffiullu aningaasartuutissaannut matussusiinissamut naammannani. Tunisineri tapiissutip qaffannerani tunisineri annertusaaneq pissaq aammalu ingerlatseqatigiiffiup amernut suliaqarneranut assartorneranullu aningaasartuuteqarneranut qaffaassalluni. Amernik tunisinerit sanariikkanillu tunisinerit malunnaatilimmik annertusarneqartariaqarput, aningaasartuuteqarnerulerneq tunisaqarnerunerunermut attuumassuteqartup kingunerisaanik.

Tassungalu atatillugu eqqaamaneqartariaqarpoq inuussutissarsiutugalugu piniartut ameertartut ukiuni kingullerni ikiliartorneri.

Ukiut kingulliit pingasut inuussutissarsiutugalugulu piniartut amerlassusaat aallaavigigaanni inuussutissarsiutugalugu piniartoq ataaseq ukiumut 50-inik ameertarpoq.

Inuussutissarsiutugalugu piniartut 64 %-ii miss. 10.000 kr.-nit tikillugit tunisisimapput. 83 %-illu miss. 20.000 kr.-nit tikillugit 2017-imi tunisisimallutik.

Puisit amiinik tunisassiornerup siuarsarneqarnissaa anguniarlugu takornarianut amernik naammasseriikkanik tunisassiortoqarnerusinnaavoq. Soorlu isersimmatinik, aqqatinik akitsinik il.il. Tunisassiat taamaattut Qaqortumi tikeraat ornittagaanni pisiassaareerput nunallu sinnerani tikeraat ornittagassaat naammassineqaraangata aamma taakkunani tuniniarneqarsinnaalissallutik kiisalu niuerniarfiit namminersortut aqutigineqarsinnaallutik.

Naggataatigut Naalakkersuisut sinnerlugit apeqqutit aalajangersimasut siunnersuummeersut suussusilersulaassavakka, taakkua aningaasatigut sunniutiginnaasaat ilanngullugit.

Tunisisartunut annertusisamik akiliisalersinnaaneq, kiisalu siumoortumik tunisisunut akiliisalersinnaanerup ingerlanneqartalersinnaanera Kalaallit Nunaata Ammeriviata amernik suli tigusinani akuersissuteqannginnerani pisalersinnaasutut isumaliutaasunut Naalakkersuisut imaattunik oqaaseqaateqassapput.

Tunisisartunut annertusisamik akiliisoqartalersinnaanera qanorluunniit isigissagaluaaraanni tamanna annertusisamik aningaasaliissuteqartoqartalernissaanik kinguneqartussaavoq. Tamannalu aamma aarlerinaateqassaaq, siumoortumik akiliisalernerup amernik naleqanngitsutut nalilerneqartunik igiinnagassanik amerlanerusunik kinguneqarsinnaammat, taamalu Kalaallit Nunaata Ammeriviata aningaasarsiorneranik ajornerulersitsilluni.

Aningaasaliinermut aningaasartuutit annertunerulissapput, Kalaallit Nunaata Ammeriviata mekaniskiusunik atortoqalernissaanut, kiisalu sinerissami quersuarni inissamik annertunerusumik pisariaqartitsinermik kinguneqassalluni. Tamatumunnga tunuliaqutaavoq tamanna aningaasaliissuteqarnissanik pisariaqartitsissammat, Kalaallit Nunaata Ammeriviata aningaasalersinnaanngisaanik. Tamannalu aamma atuuppoq ammerinermut tunngatillugu siunnersortimik atorfinittitsisoqassappat nunalerinermi aqqissuussinerup assigisaanik.

Naalakkersuisut malugeqqussavaat 2015-imiit pisariaqartitsisoqarsimanngimmat immikkut Kalaallit Nunaata Ammerivianut aningaasaliissuteqarnissamut. Kalaallit Nunaata Ammeriviata aningaasatigut sinaakkutaasut tunngavigalugit patajaatsumik inissimalernissaata anguniarnera suliarujussuusimavoq. Eqqaaneqareersutut Kalaallit Nunaata Ammeriviata aningaasaqarniarnera suli oqimaatsorsiorfiuvoq aningaaserivinni aningaasat tigorianaat - kassekreditteqarsissammat.

Naalakkersuisut piumapput 2019-imi upernaakkut ataatsimiinnissap tungaanut nassuiaammik suliaqassallutik, ajornartorsiutit siuliani eqqartorneqartut inissiivissaqartikkumallugit, aammalu taakkua aningaasaliissuteqarnissamut killiliussassanik qanoq ittunik pisariaqartitsissanersut eqqarsaatigalugu. Suliami tassani kommunit akulerunneqarsinnaapput, aqqiissutissarsiniarnermi peqataaffigisinnaasaanni. Tamannalu tunuliaqutaralugu iliuusissat nutaat pissutsinik pitsaanerulersitsissat aningaasanut inatsimmut ilanngunneqarsinnaassapput.

Naalakkersuisut qilanaaraat pitsaasumik soqutiginarumillu inuussutissarsiut ileqqutoqqanik annertuunik imaqartoq pillugu oqallittoqarnissaa.